

KERWEREDD 1984

Straußbuwe!!!!

E recht schener "Gun Dach", eer Nerremorer Leit,
bei uns iss werrer Kerb, ess werd jo a langsam Zeid

Nadierlich du ich a all die Fremde begrieße,
die Amis, die Russe unn a die Ostfrieese.

Sie kumme aus alle herre Länner, sogar die Molugge,
blos um no unserer berihmt Nerremorer Kerb se gucke.

A Presse und Fernseh ham mer heit herbestellt,
die iwvertraan unser Kerb in die gans Welt.

Unn dass es jo a gelinkt, hann ich mich e paar Woche geschunn,
dann hann in meim Kopp e paar Geistesblitzscher stattgefunn.

Ess soll sich bloß kenner iwver das, was ich vezehl, uffreche,
sunscht kann er sich glei uff de Hämweech beweeche.

Unn wems am Enn in de falsch Hals gerät,
der geht besser hääm unn bäät.

Unser Redd iss nur was fer Geniser unn Kenner
unn net fer so e paar grisgrämische Penner.

Doch ich dank eich all, die do ruff kuff sinn,
wenn mansche a vileichL nur sihe wollde, wie gros ich bin.

Isch hoff, dass mer eich was Ordendliches bringe,
damet unser Kerb a dut net mißlinge.

De liewe Godd hat uns zum Glick gut gewollt
unn de Kerb Tribut gezollt.

Er hot de Rã dehäm geloss
unn die Wolge zugeschloss.

Do unne do stehnse unn lausche,
awwer denkener, enner funn denne tät met mer tausche.

Drum greische eer erschd mol unn mache mer jo ke Schann,
damet ich dohowe amol was dringe kann.

Deno hammer bei de Musigande das Liedsche bestellt:
“Oh - wie schön iss doch diese Welt!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Doch jetschd will ich uffheere met moiner Vorgeschichte
unn ach glei es erschde Stigelsche berichde.

Im Frijoor desjoor hallte ä Schrei durchs gans Daal.
Wer ne geheert hat, fer denne werd er zur Qual.

Mer siht se beim Fernseh, dono kam die Schow,
funn de Jugos kams riwwer, das weltberihmte "SARAJEWO".

Ess greischt de Babbe, es greischt die Mamme unn dann die gans Nation
im Stereo unn im Monoton.

Ich saan eich, ferr sowas sinn mer in Nerremohr uns nett zu schade,
bei uns gebts disjor die allererschd Bierolympionade.

Jo, jo, imm ledschde Joor iss vel bassert,
de e werd vefeert, de anner bekeert.

Uff de e Seid dun se an de Spendegelder rumfligge,
uff de anner Seid duds bei de Regierung nimmi rischdisch ticke.

E warmer Schenerell war dann ess Tippelsche uff emm I,
fer dess zu vetusche macht sich de Werner veel Mich.

Doch uns, die Straußbuwe, schockt gar nix mä, meer sinn gewarnt
unn hann uns dodebei glei emol als Bierflasche getarnt.

De Sinn funn der Sach han er sicherlich glei richtisch erkannt,
denn wenn enner funn uns werd fum Derst iwvermannt.

Dann brauch er net lang se mache sei Bosse
unn kann sich in Ruh richtisch volllaafe losse.

Die Musik speelt denne Reschierungsbosse, do sinn se gans platt:
“Iwwer de Kerb erklär ich Neeremor als nei Bundeshauptstadt!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Bei dem schöne Wedder iss jo jeder zugeneischt,
sodaß er sich de Mensche zeischt.

De e fahrt mem Audo rum,
beim anner werd ess Fahrrädsche genumm.

De anner machts wie unser ehemalischer Bundespräsident,
nur daß er net glei durch gans Deutschland rennt.

So sischse halt im Dorf rumtappe
wie mer so saat, uff Schusters Rappe.

Wem mer es Perd nemmt, get so leischd ke Modor futsch,
das hat sich do hinne im Ort a änner iwwerleht, der fahrt met de Kutsch.

Unn domet sich a jeder ann der Sach erfreit,
fahrt er fascht jede Samsdach die Hochzeitsleid.

Es ledschd erschd wars mol widder soweit,
er hat fer se kumme griet sei Bescheid.

Die Zeid bes dodehi duht er a nutze
unn dut die Kutsch mol richtisch putze.

Do sieht mer ne wienere, schruppe unn poliere,
noch e bisje Eel an die Deer droschmiere.

Dann werd se geschmickt, die Perd hann a pletzlich e anneres Aussihn.
Wenns net grad in Neeremor wer, kennt mer menne, mer wer bei de Queen.

Dann gehts ab in Richtung Ramste enuff,
er muß sicc beeile, saat zu de Geilscher, halle mol e bisje druff.

Doch glei druff hann die Perdscher die Kutsch widder hemzus gezo,
der Mann vezeelt alle Leit, ei bei der Hochzett, do war kenner do.

Er iwwerleecht unn will sich grad erkunische, doch zu guterledscht,
falls emm in, do hat der gut Mann sich gladd um 14 Dah veschezt.

Die Musik speelt dem brave Kutscher gans froh:

“Mensch, Karl, schaff der endlich emol e Terminkalenner o!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Bei uns im Dorf hammer enie wohne,
die dut eer Lewwer gar net schone.

Sie denkt sich als, ich kennt jo emol e paar Bierscher zu mer nemme
unn kerz deno dutse schunn zum Alfred nunnerrenne.

Eer Mann, der find das gar net schäh,
schunn isser widder uff de Bäh.

De Alfred will er grad widder e Pilsje hidraa,
do hat se de Alt schunn glei am Kraa.

Doch uff emol hat se die Nas unde Kopp hatt voll,
do denkt se sich, ich schla em e Schnippche, dem Doll.

Sie hat sich uff de Dochder eer Fahrrad gesezt
unn iss wie wild defunn gehetzt.

Doch weit iss an dem Daa net kumm,
do hat se de Peter memm Moped uff die Schipp genumm.

Sie hann gedenkt, awei isses met der gut Fraa vorbei
unn hann geruf die Bolizei.

Ess Moped uns Fahrrad ware gans schäh geknickt,
doch sie iss häm unn hat weider geschlickt.

Ehr Musigande speele der arm Fraa gans schäh :
“Wenn ich Bier tringe, loss ich es Fahrrad stäl!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Bei uns in Nerremor duts jeder wisse,
der Winter, der is gans schäh beschisse.

Die äne hans kalt, die annere warm,
do sieht mer halt, wer reich iss unn war arm.

Doch bis jetzt hat bei uns jeder die Kält iwwerstann,
ich män, daß wär jo a e Schann.

Es gebt awwer e paar bestimmte Leit,
mer mänt, die wärn net recht gescheit.

In jeder freie Stunn, man kanns kaum vestehe,
fahn die mit em Buldegsche in de Wald, um Holz se sähe.

Die ä Karre war halt net genuch,
jetzt hanse a noch e zweiter Zuch.

Ich glaab, so sticker 15 Steer hanse schunn uffgebalt,
der nägschde Winder wärd bestimmt sehr, sehr kalt.

Doch die dun sicherlich net vefrere,
die dun sich e schänes warmes Weihnachtsfescht beschere.

Drum fro ich mich jetzt zum Schluß,
ob die net hann e klänner Schuß.

Ehr Musiker speele denne Holzfäller jetzt gans lecher:
“Wenn bloß daß Waldsterwe net wär!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Ess Lewe iss a gans schä voll met Adraktionen.
Eni fun denne dut jetzt a in Nerremor wohne.

Do hat so e junger Bersch mo sei Gehernkaschde ogestrengt
unn hat mo an sei Zukunft unn sei Geldbeutel gedenkt.

Mer hats gesieh, de Otto wars schun läd,
drum hat er sich a gans schä iwwer sei Bu gefrät,

daß der ess Geschäft a schä iwvernemmt,
denn meschdens gehn die Buwe no de Leer glei fremd.

Er hat gemennt, de Lade werft jo sowieso nimmi vel ab
unn dann halt das mei Bu wenichstens e bisje uff Trapp.

Doch mer glaabts kaum, der Kerl hat Idee
und dut sich a glei e nei Schweinche zulee.

Die Wänn wern gestrech, die Trepp werd gemacht,
iwwer die Metz hat ball kenner me gelacht.

Dann tut er sich a noch e elektrischi Kass oschaffe,
do merge die Leit net, daß es e paar Gramm me sin sie dun nur noch gaffe.

Dann hat er sich a noch ingedeckt mit alle Arte Lewensmittel hinner de Dier,
demnächst, han ich geheert, gebts a noch Benzin unn Bier.

Das glaawener net, ich kanns eich bewaise,
es Benzin kauft mer besser in de Metz bei de heitische Preise.

Unn die anner Sach braucht mer, daß saan ich noch kesser,
Iss es net wor, zum Fleeschkäs schmeckt es Bier umso besser.

Unn no e paar Woche, ei, ich war jo gans lez,
hat se gestann, die erschd superhyperautomatisch Metz.

Jetzt felt nur noch, das mer ess Fläsch ins Haus griet,
Unn de Wutze werd vorm Schlachde noch gesung e Schloflied.

Esletschd hat der Bersch anoch geheirat, ach iss das klasse,
jetzt kenne se demnächst zusammen die Sau rauslasse.

Ehr Musigande speele dem Fleischermeischder gans sachte:
“Hoffentlich dun in drei Jor net nur noch Computer schlachde!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Am erschde Mai, mer glaabt ess kaum,
stand in Nerremor e schenner groser Maiebaum.

Uff so e Ereichnis konnt mer net vezichde
unn dun in de Red a glei dodefunn berichte.

Am Morje gings los met Bum unn Trara,
ess war dann sogar die Ramschder Feuerwer da.

Doch die ware net nur zu ehrm Vegnieche gekumm,
die mußte uffbasse, das der Baam nur net steht krumm.

Jetzt heßts halt nur de Winder iwwer bete,
daß der Baam tut net nemme e paar Schäde.

Denn das wär fatal fer die gesamt Strooß
unn dät die Gemää nur koschde e haufe Moos.

No de Arwet folgt, eer wissens jo, immer de Spass
unn schunn werd geknackt ess erschd Fass.

Ess Werkfolk speelt zu de Erbsesupp, daß es nur so schallt,
die speele so schä, daß das fele Bier bei dem ä orrer anner gar net ufffalt.

Doch dann kummt de Hehepunkt, de Tipclub unn sei Dorwandschiese,
do merkt mer glei, der Gerd Miller unn de Rummelfligge losse grise.

De Michel laaft o, e Schuß, gug nur, wie der abzischt,
alles schreit Dor unn im Rathaus hats schun widder e Scheib vewischt.

Das war dem Tipclub hoffendlich e Leere,
dun liewer weider tippe, do kann nix passere.

Awwer gehn net so hart met dem Mann ins Gericht,
is jo egal, inn dem Rathaus hann se schun genung annerer Schade ogericht.

De Clou funn der Maifeier, der kam dann am End,
die gans Zeid hat jo der Kerl nur gepennt.

Do fangt er o loszulehe,
die meschde Leit fange schunn o heemzugehe.

“Mei liewe Maiwannerer” - er ment, er hot die richtische Worte getroff,
doch funn dene hat kenner gewannert, geschweige denn iss enner geloff.

Hegstens zum Bierstänsche unn zurick,
das war a bestimmt dem Alwis sei Mißgeschick.

Drum rot ich eich unn saans a zu de annere,
dun mer im Alwis zulieb nechst Jor um du Maibaam wannere.

Die Musik speelt dem Veranstalter uff die Schnelle:

“Dunn die Maifeier uff die Kerb veleen, dann dum mer de Strauß halt hochkant stelle!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Unser Dorf breicht eischendlich gar ke Zeidung
unn erschd recht kä Delefonleitung.

Alle Neiischkeide unn Geschehe wern bei uns blitzschnell vebreit,
wozu gebts in Nerremor a die Presse- unn Meinungsfreiheit.

Jeder kann saae, was er denkt,
drum sei a jetzt nimand gekränkt.

Die Fraa weiß alles ohne Ausnahm,
sie kimmert sich halt gere umm anner Leit eer Kram.

Bei de Redd muß mer domit rechne, daß mer sei Fedd weggriet,
ich si schun, wie do hinne jimand de Kopp inzieht.

Awwer er Leit, mer sinn unserer Zukunft schun weit voraus,
mer krien die Nachrichte frei Haus.

Annere misse noch läse unn gucke, umm was se wisse,
während mer nur noch zuhere misse.

Ehr Musigande hauen mol in eier Geräte,
demnächst dut die Fraa in de Tagesschau uffträte.

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Wie ehr Leit wisse, gebts zum Glick
ess Audo, daß gut alt Stick.

E jeder faschd hat so e Gerät
unn hat dodemet a sei Fräd.

De äne duts butze unn flesche unn iss gans froh,
de anner macht nur Ralliture unn duts oschtennisch jo.

lsch denk do ann e gans besonnerer Wischt,
der met seim Karre dursch Nerremor zischt.

No langer Paus hat er sich jetzt widder e Audo geleischd,
wenn der met dem Ding durchs Dorf fährt, werre die Leit gans schäh gescheicht.

Eines Dages hat er widder mol so e Rallitur gemach,
jo, jo, daß war so e Sach in de Reischbach.

Deßmo hot ers uffs Rotwild abgesieh,
hot der das zugericht das arm Vieh.

E Rehbock issem do owwe vor de Rotheck in de Kihler ninngerennt,
mer kennt menne, der Ochs hat gepennt.

Der Kerl war gans schäh voll unn konnt kaum noch geh
unn deswehe hat misse sterwe das Reh.

Mei liewer Bersch, bass du blos uff,
wenn de es negschde mo fahrschd im Suff.

Die Musigande speele jetzt gans froh:
“Fers Rotwild iss de Ferschder do!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Seit neischdem gebts bei uns im Ort e Veschenerungsverein,
der trät fer de Umweltschutz unn die Dreckbeseitchigung ein.

Do siht mer se Samschdag fer Samschdag uff de Wisse rundanse,
nur fer so e bisje Hundedreck wegsemache unn e paar Bämcher se planse.

De ä fräät sich, wenn er e Grashälmsche erblickt,
de anner iss iwwer e Stichelche Bapier, wo net do hi gehert, entzickt.

Ess Holz dun se schleppe, de Rase dun se mähe,
unn dann a noch glei de neiwertische FWG-Dinger säe.

Als die Arwet dann iss geschafft,
werd glei emol e Biersche geschluckt unn e Zigarsche gepafft.

Dann kummt a noch de Ozeischer unn macht sei Bildsche,
Awwer blos ordentliche, daß mer nur sieht ess Parteieschildche.

Jo, so werd bei uns im Dorf Politik gemach,
denn nur so griet mer bei uns sei Stimme unner Dach unn Fach.

Denn ess geischtert ä Spruch durchs ganse Land,
der iss in jedem Kuhderfsche schun bekannt.

“Unser Derf soll schöner werden”, das iss die Devise,
do duun sogar beim vederteste Baam noch e paar Blättscher sprise.

Do dut sogar unser Gertner sei Geidbeitel zikke,
unn dem machts jo nix aus, der hat jo die Mikke.

Drum tut er a noch e paar Bämcher zur Vefichung stelle,
daß die Leit nur nimmi iwwer sei Tierke schelle.

Das der bei der Umweltschutztruppe iwwerhabet metmacht, iss de greschde Clou,
der zieht jetzt wohl de annere Leit o sei stinkischer Schuh.

Denn for gar net alzulanger Zeid
macht sich im Umfeld fun Nerremor e Gericht breit.

Endlich werd mo do nimmi die Kellere vesaut,
do unne beim Mast am Bahnhof han se e neii Klärgrub gebaut.

Awwer eer Leit, es hat sich losse net vemeide,
seit em 17. Juni tut der Unternehmer a noch im Gemänerat sei Mischte vebreite.

Bei de Auszählung funn de Wahl war er jo gans schön geknickt
unn hat die gans Zeit nur uff de Fingernächel rumgeblickt.

Es hat halt geklappt, ich kanns net vestehe,
na vielleicht hats an seiner gute Wahlbeihilf gelehe.

Er hat em gezeichnet, wo ma sei Zettelsche ninschmeist,
hat nur noch gefehlt, daß er em es Kreizje uffem Zettel weist.

Die Musik, der Freie Wählergruppe zur Warnung:
“Das Grin bei dem Gärtner do iwwe iss alles nur zur Tarnung!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Ach jo, zum Schluss noch was zu unserm schöne Kerchekor,
fer die Leit dort se vestehe, dozu gehert e große Portion Humor.

Ann denne ehrer Musig, do iss jo faschd gar nix los,
dodebei iss ess Inderesse an de Nerremorer Kerb sunschd unheimlich gross.

Geschdern owend hanners erschd widder erlebt,
wie de Kerchekor ess Vetraue vunn de Nerremorer Leit so unnergräbt.

Awwer mer mussess jo vestehe, bei denne mus ess Geschäfd laafe,
sunschd kenndense jo kä neie Node mä kaafe.

Wie wärs dann, hamerse gefroot, wenn ehr die Straußbuwe ohne Intritt rinnlosse däte,
ach god, hann die sich ball in die Hosse gemach wehe denne paar Krete.

Mer gets jo net um das, was ich gespart hann groß,
awwer wem mer net wäre, wär do hunne iwwerhaupt nix mä los-

E Kaschde Bier wolde mer hann umsunschd fer die Straußbuweschar,
ei do hammer misse feilsche wie uff em arabische Basar.

Wem merse froot, schiebt de ä emm anner die Verandwordung hin,
ei sunschd wollense doch ah immer de erschde Mann sinn.

Die Musik speelt dem Kerchekor inn unserm schene Ländsche:
“Wenn des net besser werd met eich, bringe ehr for unserer Hausdeer nimmi eier Ständche!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Oh weh, oh weh, mensch geb mer noch e Schluck,
mer werds schunn gans schumrich, wenn isch uff des Enn do guck.

Mer hans geschaffd, geschlaa iss die Schlachd
do owwe der iwver mer det jetzt saa: "Es iss vollbrachd!"

Jetzd kennener jo saa, was iss dann do schunn debei, ich wäs jo, ich wäs,
Awwer ich mecht eich do howwe sihe unn das met meiner Greß.

Es gebt noch vel me iwver die Nerremorer Leit se vezele,
Awwer isch will eich net länger quele.

Nun denn, losse uns de letdschd Akt vollzihe,
ich will mich a nochmol bemihe.

Denn befor eer losse eier Biersche in die Kehl nunnerlaafe,
dun mer noch erschd unser schener Strauß daafe.

Strauß mit Wein begieße !!!!

E Zeische sollsche sinn, e Denkmal, wie er do steht,
dass jeder an unser Kerb denkt, der uff die Fels enuff geht.

Unn noch e Word zu unserm ärmschde Straußbuu funn alle,
wehe dem, wer beinah die Kerb ins Wasser gefalle.

De Kaiser iss net do, er hat a geschmeß de Strauß,
doch dodefor feiert der jetzt die Kerb im Krankenhaus.

So jetzt iss awwer genung, hoffentlich nemm isch ke Schäde, ich kenn do e paar do unne, die
mich no der redd es libsched funn de läder schmeiße däte.

Doch dodefor hat sich die Fels a kräftisch gerischd,
herner a, wies Bier drin schun zischd.

Jetzd dun isch mich awwer endgiltisch do runner bewehe,
ach Gott, ess iss jo erschd Sundach, wie soll ich die Kerb bloß iwwerstehe.

Hoffentlich siehn mer uns widder im nächsde Joor,
do iss werrer Kerb in Nerremohr.

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!